



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Baucau

7 Maiu 2015

Tribunál Distritál Baucau mis-interpreta provizaun kona-ba tentativa no absolve arguidu hosi kazu tentativa violasaun seksuál

Iha 05 Maiu 2015, Tribunál Distritál Baucau absolve arguidu EX hosi krime tentativa violasaun seksuál kontra lezada AAO, maske durante julgamentu produsaun ba prova arguidu rekoñese aktu ne'e. Kazu ne'e akontese iha 23 Janeiro 2014, iha Distritu Baucau.

Iha julgamentu arguidu deklar katak nia tenta hasai lezada nia roupa ho intensaun atu halo relasaun seksuál maibé wainhira rona motor ida lian halai mai besik fatin akontesementu, arguidu halai husik tiha lezada.

Iha parte seluk, lezada mós deklar katak iha momentu ne'ebá, wainhira arguidu foin habesik – an ba lezada derepente rona motor ida nia lian no arguidu halai no la konsege halo violasaun seksuál hasoru nia.

“JSMP hanoin katak tuir lolos tribunál tenki kondena arguidu tanba impedimentu ne'e la'os rezulta hosi arguidu nia konsiente rasik maibé tanba fator external ne'ebé obriga nia atu hases aan hosi lezada. Maske intensaun arguidu nian la konsege realiza maibé aktu ne'e hatudu arguidu nia intensaun klaru katak nia atu viola lezada,” dehan Diretór Ezekutivu JSMP, Luis de Oliveira Sampaio.

Iha artigu 23 Kodigu Penál kona-ba tentativa defini katak *“tentativa iha kuandu ajente hahú ezelesaun iha krime ne'ebé nia hola tiha ona desizaun atu halo, no halo, hotu ka balu de'it, aktu sira-ne'ebé objetivamente bele prodúz nia rezultadu no rezultadu ne'e la mosu tanba de'it sirkunstánsia ne'ebé laiha relasaun ho ajente nia vontade.”*

Tuir mai iha artigu 24 Kódigu Penál kona-ba tentativa nia punibilidade, defini katak:

- 1). Iha krime dolozu ne'ebé bele fó-fatin ba pena prizaun ho limite másimu aas-liu tinan 3 no iha kazu ne'ebé lei determina maka tentativa bele fó-fatin ba punisaun.
- 2). Salvu dispozisaun seluk, tentativa fó-fatin ba pena ne'ebé sei aplika ba krime konsumadu, ho atenuasaun extraordinária.

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

JSMP hanoin katak tribunál tenki avalia no konsidera profunda faktu sira ne'ebé produz durante julgamentu. JSMP fiar katak tribunál hatene didiak deklarasaun arguidu ne'ebé deklarara momos katak nia tenta hasai lezada nia roupa atu realiza nia intensaun maibé tanba deit rona motor ida nia lian liuhosi fatin ne'ebá, nia halai husik tiha lezada.

Deklarasaun ne'e hatudu katak arguidu iha intensaun atu komete violasun seksual hasoru lezada, infelizmente aktu ne'e la konsege realiza tanba deit impedimentu external ne'ebé laiha ligasaun ho arguidu nia konsensia rasik.

Tuir lolos tribunál labele absolve total arguidu hosi krime ne'e, no tenke kondena arguidu nune'e evita krime ne'e akontese fila fali iha futuru. Desizaun ne'e haruka mensagen ne'ebé la- edukativu ba komidade no loke dalan ba possibilidade atu mosu krime seluk iha futuru.

JMSP mós hanoin katak tribunál la bele rona deit lezada nia deklarasaun tanba dalaruma ho akontesimentu ne'e, lezada senti moe ho saida mak akontese ba nia nune'e wainhira iha prosesu julgamentu, lezada tenta atu hato'o faktus ne'ebé kontrariu ho nia deklarasaun antes iha ministériu públiku. Lezada rasik tenta proteze nia aan hosi prespetiva komun ne'ebé to'o agora balun sei kontinua fo merese ka fo sala ba vítima sira hosi krime violasaun seksuál.

Ministériu Públiku akuza katak, iha 23 Janeiru 2014, tuku 12:00 meudia, arguidu rasta lezada nia liman no riba lezada ba rai. Hafoin arguidu kontinua tuur iha lezada nia leten no buti lezada nia kakorok. Arguidu tenta hasai lezada nia roupa no taka lezada nia ibun atu halo relasaun seksuál ho lezada maibé la konsege tanba derepentini rona motor ida lian mai, nune'e arguidu halai husik hela lezada no lezada mós la konsege hakilar. Kazu ne'e akontese wainhira lezada sai hosi uma atu ba foti roupa iha nia avo nia uma. Wainhira iha dalan klaran hasoru arguidu no halo asaltu ba nia ho intensaun atu halo relasaun seksuál.

Ministériu Públiku akuza arguidu kontra artigu 172 Kódigu Penál kona-ba violasaun konjugadu artigu 23 Kódigu Penál kona-ba tentativa.

Iha alegasaun finál, ministéru públiku konsidera katak bazeia ba produsaun ba provas durante julgamentu arguidu komete duni krime tentativa violasaun seksuál hasoru lezada. Ministériu Públiku deklarara katak arguidu la konsege ezejuta nia intensaun tanba de'it rona motor ida lian mai no arguidu halai husik hela lezada. Tanba ne'e, ministériu públiku husu ba tribunál atu aplika pena prizaun ba arguidu.

Iha parte seluk, defeza deklarara katak arguidu nia hahalok la prenze krime ne'ebé ministériu públiku akuza ba nia tanba ne'e husu ba tribunál atu absolve arguidu hosi akuzasaun.

Julgamentu prezide hosi tribunál koletivu kompostu hosi Dr. Hugo da Cruz, Dr. Afonso Carmona no Dr. Jose Celestino. Ministériu Públiku reprezenta hosi Dr. Alfonso Lopez no

arguidu hetan akompaniamentu legál hosi Dr. Jonas Henrique no Dr. Jose M. Guterres (estajiáriu).

Atu hetan informasaun kompletu favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone:3323883 | 77295795